

حكاية ست الستوت وعنبر المستوت

كان ما كان وعلى الله التكلان . كان اكو فغد بيت بينو مغا وغجال
وولدين ابن و بنت . كانوا متونسين بحياتهم ما عندم شي يكدر عيشتهم .
بعدين ماتت الام وبقوا الاولاد بلا ام . ابوهم ما قبل يتزوج . خاف عل
اولاد لا يتبهدلون . اعتنى بيهم وخاف عليهم وداراهم اكثيغ . ولمن كبعت
ال بنت جابلا ملاسى (ملايه) تعلمنا قرأيت القرآن . كانت الملاي نداري
هاي البنت : تمشط شعرا وانكدلا والبنت هم حبتا واعتبرتتا مثل اما .
الملاي كانت اتقللا للبنت ليش ابوكي ما يتزوج ؟ كانت البنت اتقلا يخاف
علينا لا تجي مغت الاب اتبهدلنا . قتللا قليلو اذا اخذت الملاي تدارينا
وتتقيد علينا وتصيغ مثل امنا . اتوسلت البنت بابوها ان يتزوج ولحت
علينو اكثيغ . قللا ويصب اكو مغا شفيقة حنونة قللتولو بنتو يابا خذ
الملاي هاي خوش مغا وتشفق علينا . الاب وافق الخاطغ بنتو وانزوج
الملاي . بعدما اتزوج الاب لمدة شهر زمان كانت هاذي الزوجة تعامل الاولاد
معاملة طيبي ، وتتقيد عليهم . لكن بعدين قلبت عليهم وقامت اتغاغ منم
امبور ابوهم كان يحبهم . كل يوم كانت تتقاتل معاهم وتقتلم ونشكيم
لابوهم لمن يجي عل بيت لمن خلتنو هو هم يقسا عليهم . قللا اش اعمل لم
وين اوديهم قللتلو غوح ضيعم وانا اجيب لك اولاد غيغم واحسن منم . هو
كان يحبا وما يغيد يخلي خاطرا . قام اخذ الاولاد وغاح وداهم ابمكان
ابعيدى . لمن صاغ عليهم دنى ليل ناموا تركم ورجع على بيتو . لمن قعدوا
من النوم غشعو نفسم وخدم ما عندم كل احد انقهغو وبكيو على خالم .
مشيو غشعو عين ماي الاخ عطش غاد يشغب من هاي العين لمن اتقغب منا
ديشغب صاحت العين كل من يشغب مني يقلب كلب . ما خلتنو احتو
يشغب منا . مشيو اكثيغ غشعو عين ماي جا الاخ ديشغب منا . صاحت
العين كما من يشغب مني يقلب ححش . اختو ما خلتنو يشغب منا . مشيو
غشعو عين ماي جا الاخ دى يشغب منا صاحت العين كل من يشغب مني
يقلب غزال . لكن اخها عطش اكثيغ وما بقا يصطبر قام شغب من هاي
العين . بعدما شغب قلب غزال .

مشيت البنت ومشي اخوها معاها وقد انقلب الى غزال . غشعو
قصغ عيلي . قعدو تحت حايط هذا القصغ . طلعت العبدي طشتت
الوسخ تحت حائط القصغ . قامت البنت واخوها تفتش بهذا الوسخ
غشعت (لؤلؤة) . اخذتا ودفنتا بالاطخاب (التراب) . وكانت تقعد
ابجنبنا تبكي وتسقيها وتداريها حتى كبغت هاي اللواي وطلعت سجفا
(شجرة) اكبيغي بيها عناقيد لولو . فغحت بيها البنت وكانت تقعد
مقاييلا وتسألا : اشجيرتي يا اشجيرتي فتجيبها الشجرة ها عين اشجيرتي
اتقللا منو سقاكي اتقللا السجفا دموع عنيكي . اتقلا البنت منو داراكي
اتقللا السجفا اكفوف ايديكي اتقللا البنت دنكثي دطمش عليكي . ننكث
السجفا لولو . تجمعوا البنت واتفوح اتبيعو . صاغ عندا افلوس اكثيغ .
اشتغت الاغض اللي بيها السجفا . وبنت عليها قصغ مثل قصغ الملك
وقعدت بينو هي واخوها وكانت كل يوم تسأل السجفا والسجفا تجاوبا
وتنكث لولو وتعطيها . فغد يوم غشعا ابن السلطان . حبا واتزوجا وعاش
معاها هي واخوها الغزال وخلا عندا عبدي تخدمنا . طلع ابن السلطان عل
صيد وكانت مغتو حامل . وصا العبدي ان تنقيد عليها وتداريها لكن
العبدي كانت اتغاغ منا . فغد يوم غادت مغت ابن السلطان دتسبح .
جابت العبدي الطشتت وحطتو على ثم البيغ . لمن قعدت دتسبح وقعت ابطن
البيغ . سدت العبدي البيغ وخلتا ابطنو . لبست هي احواسا وصاغت
ابمكانا . كانت اتفوح عل سجفا وتسألا : اشجيرتي اشجيرتي . تجاوبا
السجفا طمامي عليكي . تقللا منو سقاك اتقللا عميت عنيكي . اتقللا
منو داراك اتقللا اتكسفت ايديكي . اتقلا دنكثي دطمش عليكي تنكث
السجفا غماد اسود اتواريها بينو . لمن عغفت العبدي ان جيّت ابن
السلطان قغبت وصت الحكما قللتم اذا جا عليكم وسألكم على دواء لي قلولو
ينغادلا كبد غزال يعيش معاكم بالبيت حتى تتخلص من الغزال . ووضعت
تحت اضلاعا خبز اغقاق (خبز رقيق) ودهنت وجها بالكفكم واتمدد عل
تخت . لمن جا ابن السلطان وغشعا قللا ليش هاكذ كن اتغيرت قلتو من
قهغي عليك جابلا حكما قلولو ينغادلا كبد غزال يعيش معاكم . قلمم لكن هذا
الغزال عنز عليها اشلون نذبو ونطعما كبدو . غدت هي قالت ما دام
اتغدنني اطب خاطر ك اقل يذبونو . جاء القصاب يذبغ الغزال . جاء
الغزال ووقف عل بيغ وصاح : ست الستوت ، وعنبر الستوت ، حيكييني
كلمى قبا ، ما اموت . بحاوبو صوت من داخل البيغ : ابن السلطان
ابحضنن ، والشعغ كن حللنن . مالي عليك وصول . الذي يذبغ غالي
سكنتو خشب ، وجدرو انقلب ، ولذبغ غزالي يعما ويجينو الكلب

(يصاب بداء الكلب) • لمن ديجي القصاب يذبحو تنقلب سكينو خشب ويعما وينكلب • وكل قصاب يجي ديدبح هذا الغزال تنقلب سكينو خشب ويعما وينكلب • كان ابن السلطان يغشع الغزال يجي يقف على بيغ • اتصنت يسمع حس داخل البيغ • فتح البيغ يغشع مغتو والولد ابحضنا والشعغ كن جلولو • طلعا من البيغ وحكتلو صحبتنا من اولا الى تاليها • امر ابن السلطان ان يصيح دلال بالبلد كل من يحب السلطان ويغيدو يجيب حطب • وحضر احصانين ويحد خلانو جوعان مدة طويلي واللاخ عطشان مدة طويلي وشد العبدي بيهم وخلا قدام الحصان الجوعان اكل وقدام الحصان العطشان ماي لمن شد العبدي بيهم انقسمت بالنص جاب الحطب وضعوا فوقا وشعلا • وعاش هو ومغتو والغزال عيشي سعيدي وكنا عدكم وجينا •

ما هكذا وما كان يا شمعدان البان

كان • او ما كان • او على الله التكلان °

كان اكو فغد سلطان خلف ابن اوبنت اومات هو او مغتو • الابن كبغ والبننت كبغت او كانت اكويسي اكنيغ • او كان اخوها ايحبا او يخاف عليها من الهوا لي هب • فلما كان ايفوح على شغلو كان يغلق الباب عليها بالمفتاح او ياخذو معانو •

فغد يوم من الايام نسي اخوها المفتاح على الباب او ماخذو معانو • ما تغشع اختو الا اوفاتت عليها مغا عجوز • بيذا باقة نرجس • قتلنا هذي اول مرة اغشع بابكم مفتوح ، قلتو دفوت اسلم عليكم وعطيك هذي الباقه مال النرجس اشد . قد غيحتنا طيبي • ما اتلوق الا الكي • وخذتي اشتميتها • اخذت البننت باقة النرجس او شمتا او شكرت المغا العجوز او طلعت ودعتا لي الباب • وبقدرة الله جبلت البننت من شمة النرجس • بعد كم يوم شعرت بالوحيم واخذت بطنا تعلا • او لما انقضت تسع تشغ جابت بنت سبحان خالقا والخالق احسن • ولما كانت تستحي من اخوها كانت كلما ايقب اخوها من جيتو اتقلا للاغض « انشقي وابلعها » تشفق الاغض و تبلع البننت • اولن ايفوح اخوها اتقلا للاغض « انشقي وابلعها » تطلع البننت اتلعبا اما او اطعما او اتنظفا لمن ايقب اخوها ديجي اتقلا للاغض انشقي وابلعها • او ظلت على هل حال الى ان فغد يوم نسي اخوها غرض من اغراضو بعد ما غاح او غلق الباب اوها كن قالت للاغض انشقي وابلعها لما سمعت حس المفتاح بالباب قتلنا يا اغض انشقي وابلعها • بلعتا الاغض